

香山慈幼院編

國賊殷鑑

魚子題



中華民國二十一年三月廿日再版

定價每本大洋一角五分



編輯者 香山教育圖書館

發行者 香山慈幼院

印刷者 香山慈幼院第五校 慈平工廠

序

孟子曰。羞惡之心。人皆有之。雖孩提之童。亦莫不  
具此良知良能也。苟就其固有之知能。善導而養  
成之。則其收效也必大。故言治身。則曰行己有恥。  
言治兵。則曰明恥教戰。言治國。則曰禮義廉恥。是  
謂四維。四維不張。國乃滅亡。恥之所關。寧非重乎。  
古之國家。教士用人。必須重其氣節。養其廉恥。而  
後可以備緩急危亡之用。禮記儒行篇。儒有委之  
以買財。淹之以樂好。見利不虧其義。死之以衆。沮

之以兵。見死不更其守者。所以表其特立也。有此特立之儒行。處治世則直言敢諫。可以致英主之敬畏。處亂世則捐軀就義。可以爲國家之光榮。宋明之末。死節獨多者。卽此士氣之所養成也。近代以來。武人當國。不知所謂尊賢重士之道。以奴隸廁養。視其部屬。以金錢勢力。誘其服從。讒諂阿諛者。謂之忠。卑鄙貪污者。謂之才。勝已異己者。忌之殺之。而獨喜其類。已與不如己之人。以致羣小滿朝。心喪盡。一旦外患忽乘。領土淪亡。而賣國求

榮奴顏婢膝。以供敵人之頤指氣使。忝不知羞者。妻妾皆出於當道昔所寵幸之人也。夫其人可以利誘者。即可以爲敵誘。可以媚已者。卽可以媚外人。國賊之多。殆有由來矣。孔子曰。鄙夫可與事君也與哉。其未得之也。患得之。旣得之。患失之。苟患失之。無所不至矣。孟子曰。如使人之所欲。莫甚於生。則凡可以得生者。何不用也。使人之所惡。莫甚於死。則凡可以避患者。何不爲也。夫人而爲金錢勢力之所薰染。得失生死之所縈惑。無所不至。無所

不爲。尙何羞惡之可言乎。雖然。此輩國賊。甘爲人役者。固無羞惡之心。而役之者之人。較其是非善惡。究未嘗無羞惡之心也。故漢高祖之於丁公。明太祖之於危素。始雖利其不忠。終必鄙其不忠。貴之賤之。榮之辱之。然則彼國賊者。究何所益耶。黃陶庵所謂不合於義而又不免於死之言。洵可爲國賊之一針砭也。余觀於大公報所載瀋陽醜狀。有感於中。特囑香山圖書館主任賀秉鈞搜集廿一史材料。編輯國賊殷鑑一書。自春秋以至前清

約得國賊二百餘人。大都於叛降受職後。仍爲其所誅戮。或至滅族。無一人得以富貴壽考終者。求榮反辱。求生反死。遺臭及於百世。雖孝子慈孫不能改也。然則今之爲國賊者。其亦可以鑑矣夫。

中華民國二十一年春二月熊希齡序



瀋陽直是鬼賊世界 錄二十年十一月二十二日天津大公報

日人勾結無恥華人之種種内幕

自津變事起。關內人士均移其目光注意於此。日人在瀋陽之鬼賊伎倆。更因此而得掩蓋。頃有某氏函在津友人。述及日人在瀋勾結無恥華人之種種内幕。頗多外間罕知之事。於最近進行之復辟陰謀之變幻離合。尤爲詳盡。特爲揭出。以諗讀者。

(上畧) 此間之事所能見之本地報紙者。久已是非顛倒。茲就所知。略述一二。或亦可備異聞也。地方維持之初起。本係李香齊(友蘭)丁鑑修二人捧袁出場。丁爲日本通。李爲本溪煤鑛總辦。均與倭人接近。故聯絡較爲容易。而溝通其間者。則趙欣伯之力爲多。列名會中之人。于(冲漢)因病初未前來。修得一(兆元)與袁派別不同。亦未親來簽字。闕(朝璽)則另有四民維持會會長可幹。初時對於此會亦不甚起勁。會成之後。滿街張貼佈告。而對於

土肥原之市政公所。須用呈文。可憐已甚。不數日。丁得瀋海路。李爲官銀號復業事。雙方奔走甚力。迨得日方允許開門。而條件遂不能如李等所預擬之順手。強迫會議之次日。李仍率領官邊兩行之人。手捧條件向軍部有所呈請。立門外甚久。終無轉圜。其夜李家中又爲匪劫。（日人主使）遂匆匆赴哈。秘密入都矣。闕之四民會。其兩副手一祖獻庭。一王某。均站上流氓。聲名太劣。闕急于出頭。遂爲其架弄。不數日。日兵入闕宅收槍。闕遂又不得不辭四民會。仍常到地方會矣。日人對於此間本有欲立文武兩頭之意。武頭屬意於闕。派人詢其意見。闕言我向來敢作敢爲。老張小張我均不管。老蔣我亦不怕。日人于此認爲滿意。擬以清鄉屬之。惟不願當真多花錢。而風示闕令先墊本。云三數月後自有收入。決不吃虧。然都無此本錢。又一說。因日人所卵翼之土匪。以新勢力相號召者。所在多有。恐闕出場後。將此等新勢力掃除。軍部報銷難造。故亦不願闕急出場也。袁自市府改組之後。氣象日漸光昌。財政實業兩廳同時由會

中發表。關董初（鐸）之四洩。亦由會任命。已隱然省府。而日方意以爲不足。必欲其遷入省府辦事。宣佈獨立。與中央斷絕關係。此事催逼已久。卒之於初九日。經上午直至夜深之鴻門宴式會議。完全遵辦。遂成今日之局面。聞會議回家之後。曾痛哭一次。不知確否。會中委員有金息侯（梁）。當初卽是軍部所授意。其與復辟事有關。不問可知。袁平時常說我之出來不問已往。不管將來。祇維持目前一段落。有誰要求隨時奉讓。金已飽聞其語。一日金忽謂袁。老既有隨時讓人之意。何不卽讓與恭王。袁色莊不語。金知話不投機。次日卽不到會。又數日卽隨土肥原赴津矣。恭王來此。則由祖獻庭之趨奉。住山右王公館之房子。而爲四民維持會之首領。赴北陵上坟之日。卽爲宣傳貧民每人發給棉衣一套。於是夾道歡迎者兩萬餘人。實未花一錢。恭王本亦無錢也。祖獻庭爲滿鐵方面所鄙。近已因其招搖過甚。在日站拘禁矣。四民會中有所謂七十餘團體者。太清宮榮壽寺均各爲團體之一。其餘可想。此等團體在山右

王公館開會。組織獨立政府建設研究會。舉執行委員十五人。而恭王爲之長。於是門首懸牌。大有不日大舉之勢。恭王意在自登九五。並無推戴宣統之言。但不知日人既聽其設立機關。而對之態度亦甚冷落。不知其果何用意耳。地方會被迫遷入省府之第一日。因時間匆促。祇簡邀領事團。未多發帖。而恭王居然前往。當衆演說。語中涉及東鄰善意。助我立君之音。日人未容畢其辭。即謂現非說話之時。阻其往下再說。趙時敏曾往謁見。據云此事需要人捧。非自己所能主張。大有沾沾哉。吾待價者也之意矣。土肥原赴津之後。聞搬空之帥府房屋。已在裱糊。有所預備。而金（梁）由津來函致趙時敏。託其收拾故宮。並云總理大臣一席。上意須請潔老担任。趙以此函示袁。袁一笑置之。未加可否。於此期間。日人令城內同興元絲房包作龍旗。最好者八十三面。次者千數。其最普通之印刷龍旗。則日站之印刷所加工。日夜趕印。事爲領事團所聞。詰之日領。日領謂此乃中國人之事。軍部不過問。亦不干預。各領謂此事若成。

我輩處此似有問題。日領謂決無關係。可見日領亦完全承認矣。迨至津變之後。此事亦愈唱愈高。德領又往問日領。謂此事如確。似領團均當走開。因是派來中華民國者。若已另立一國。則將來外交承認自當遣使。我輩實無資格在此存住。其語似莊實諧。日領乃忽謂此爲華方謠言。決不能有此事實。完全否認。其日晚間。即將已做成之貨由日人定做之全數取去。並將走漏消息之小北門某成衣舖人當晚遣散。並於下兩日即十五日內日人送交城內商會。印成紙旗一萬張。文爲「慶祝政權有歸」。令各商遊行慶祝。與日人之請求增兵大遊行相呼應。商店方面祇得將此旗各插門首。並未遊行。此昨日事也。今日則聞宣統已到旅順。事在必行。但不知又將出何花樣矣。日本領事因自九月十八日之後。軍人專權過甚。凡事無領事說話餘地。此次龍旗事。日領亦頗受歐美人之窘。遂於遊行之前回國。並擬辭職不來矣。滿鐵方面對於軍人亦頗表示不滿。因其遇事專主。不與滿鐵商量。彼方之文武不能一致。於此可

見一班矣。所謂凌印清之事。日方祇花去大洋五千元。步槍三百桿。盛京時報爲之鼓吹。云可號召二十萬人。現在幸已過去。而繼凌而起之張學成。則盛京時報尙在日日爲之鼓吹也。江橋日兵日見增加。聞已達兩萬之數。津變幸已了結。土肥原東來。恐又將有事於錦州矣。此間最起勁者爲丁趙兩人。丁得瀋海後。又得交委會。而交委會之組織。則闕齋初（鐸）爲之條陳一切。因其餘均外行也。會中財權則操之目人。因銀行存款。爲目人仗軍部之力量。用槍杆得來也。丁之談吐一切。蓋已無一處不同化於目人矣。趙得市府。費全力爭得警權。而電燈電話。則因在日人手中。卒未能爭得。最高法院則到手。亦並無辦法。前又往攫取礦務局。已將到手矣。而實業廳中之目人。則云此局應歸實廳。弄來目兵兩名。住局中數日。拒趙。趙亦無如何也。趙常云此間事不易辨。非盼到合肥出來。不能有頭緒。更不知其意何所指也。湯二虎方面。竟未動。亦可云幸事。則二虎之動靜。或亦與復辟有關耳。津報所載日人畏胡子之事。亦確爲事。

實。通遼方面。日人失敗。已非一次。即省城匪警。日人除老遠開槍外。亦決不敢前進也。張海鵬之不堪。當爲奉天人中首屈一指者。其初日人送與此間得之軍火。軍裝十四車。囑其起事。南北均可。而張意在江省。迨一戰而敗。遂又請日人派兵爲前驅。其左右之勸阻之者。多爲所殺。此人可謂真正渾蛋。與張學成可稱一對。于雲章（冲漢）於地方會遷移省府之前兩日來省。老病似又不克自舉其軀。聞袁得其贊助。方能決定此局。現則于任自治指導會事。以垂死之人。出而作此事。雖云被人逼迫。然亦太難矣。闕子貞則迄今無相當位置。與致亦消沉矣。但日方對之有令守機會必使之出來之說。故並未死心也。已成之各機關。莫不有又桿之日人。以顧問諮議名目而實際拿權辦事。此等日人大抵浪人一流。滿鐵方面。亦云軍部所用。均滿鐵不要之人。其混雜可想。袁老頭曾云。我不做李完用。其實在所做已成李王。恐更非完用之比。一歎。頃聞宣統已到。恭順。現在尙無辦法。從前滿鐵有出錢辦大事之說。現已不能出錢。恐

將擱淺矣。

國賊殷鑑



# 春秋

伯，詬。春秋。楚州掣孫奔吳。夫差時爲太宰。夫差伐越。敗之。勾踐使文種因詬以行成。伍子胥諫不聽。越既滅吳。以詬爲不忠。誅之。

周，獸。春秋。衛大夫成公爲晉人所逐。使賂冶廩及獸。獸曰。苟能納我。吾使爾爲卿。二人殺元咺。及子適子儀。公入祀先君。二人服卿服。將命。獸先入。及門。遇疾而死。廩辭卿。

南宮，長萬。春秋。宋閔公時爲大夫。魯莊公伐宋。敗之。公以金僕姑射長萬。公右欲孫生搏之。宋人請之。宋公斬之。曰。始吾敬子。今子魯囚也。吾弗敬子矣。長萬病之。遂弑閔公。

寧，喜。春秋。衛大夫殖子。卽悼子。獻公亡在齊。使與悼子言曰。苟反。政由寧氏。祭則寡人。悼子告右宰穀。穀曰。不可。獲罪於兩君。天下誰畜之。悼子曰。吾受命於先人。不可以二。與右宰穀伐孫氏。不克。出舍於郊。國人召悼子。復攻孫氏。克

之。遂殺殤公而納獻公。獻公復立。而寧喜專。公患之。公孫免餘攻寧氏。殺喜及右宰穀。尸諸朝。

秦

司馬欣。秦章邯長史。請事咸陽。銷高不見。欣報章邯曰。事無可爲者。邯乃與項羽盟。分天下以王諸候。欣爲塞王。漢王擊三秦。欣降復叛。漢初被楚軍成臯。欣自剄死。

莊·賈。秦爲陳勝御士。勝爲章邯所敗。賈遂殺勝降秦。後勝故涓人呂臣爲蒼頭隊攻陳。下之。賈被殺。

漢丁公爲項羽將。追漢王彭城西。短兵相接。王急。謂丁公曰。兩賢豈相厄哉。丁公引兵還。及項羽滅。丁公謁見。帝以狗軍中。曰。丁公不忠。使項王失天下。遂斬之。曰。使後世爲人臣者。無效丁公也。

漢

英，布。漢六人。少時有客相之曰：當刑而王。及壯，坐法黥。因謂之黥布。秦末以兵屬項梁。梁敗死，復屬項籍。每戰常以少敗衆，從入關，籍封爲九江王。漢遣隨何說布歸漢。佐高祖定天下，封淮南王。後以韓信、彭越見誅，懼禍及己，發兵反。高祖討破之，布走越，爲番陽人所殺。張，竦。漢紹從弟，字德松，亦作柏松。紹與劉崇攻王莽敗，竦與崇族父嘉詣闕自歸。竦爲作奏，封淑德候。官丹陽太守。長安語曰：欲求封，過張伯松。方戰鬥，不如左爲奏。莽敗，爲賊民所殺。

曹，毋傷。漢爲高祖左司馬。聞項羽欲攻高祖，使人語羽曰：沛公欲王關中，珍寶盡有之。羽大怒，欲攻殺高祖。高祖之鴻門謝，羽曰：此沛公左司馬曹毋傷言之。不然，籍何以至此。高祖歸，立誅之。

魏，豹。漢咎弟。魏之諸公子，咎敗自殺。豹走楚。楚懷王予之兵，使復徇魏地。下魏二十餘城，立爲魏王。引兵從項羽入關，而欲有梁地。徙豹河東，爲西魏王。及

漢王定三秦。以國屬焉。已而畔漢。漢王使酈生說之。豹謝曰。人生一世間。如白駒過隙。今漢王嫚侮人。罵詈諸侯如奴耳。吾不忍復見也。漢王遣韓信擊豹。虜之。令守滎陽。楚圍之急。周苛曰。反國之臣。難與共守。遂殺豹。騶餘善。漢閩粵王後。建元末。餘善兄郢擊南越。漢兵至。餘善殺郢。時漢已立無諸孫繇君丑爲越繇王。復立餘善爲東越王。元鼎間。南越反。餘善陰持兩端。爲繇王所殺。詔徙其民於江淮間。國遂亡。

### 後漢

王，元後漢。長陵人。字惠孟。事隗囂爲帥。囂將歸光武。元說囂東封函谷關。據隘自守。及囂敗。元降臧宮。遷東平相。坐墾田不實。下獄死。

張，步。後漢。琅邪人。字文公。光武初起。步擁衆據本郡。光武遣伏隆拜步東萊太守。步殺隆。後爲耿弇所敗。降漢。封安丘侯。旌招欲其故衆入海。琅邪太守陳俊擊斬之。

逢，安。後漢琅邪人。王莽時與樊崇同起兵。劉盆子爲帝。安推爲左大司馬。後隨盆子降於光武。居洛陽。賜田宅。復以反誅。隗，囂。後漢成紀人。字季孟。王莽末據隴西。稱西州上將軍。初附更始。旋屬光武。後又叛附公孫述。光武西征。囂奔西域而死。隗，純。後漢。囂子。囂死。其黨立純爲王。旋爲來歙耿弇等所攻破。純降。徙弘農。後與賓客數十騎亡入胡。至武威被捕。誅死。

### 三國

于禁。三國。魏。鉅平人。字文則。初從鮑信。王朗荐之。武帝召拜軍司馬。前後征戰有功。武帝稱爲名將。封益壽亭侯。累遷左將軍。假節鉞。禁持軍嚴整。得財物無所私。曹仁討關羽於樊。武帝遣禁助仁。兵敗遂降。會孫權擒羽。獲其衆。復在吳。文帝踐祚。權遣禁還。帝使詣都謁高陵。而豫於陵。瓦畫禁降羽之狀。禁見。慚恚發病卒。諡厲。

成，濟三國魏爲太子舍人。黨於司馬昭。昭事政。魏主髦率衆攻昭。濟前刺魏主髦。刃出於背。昭乃歸罪於濟。捕殺之。

孟達，達三國魏他子。字子度。一字子敬。初事劉璋。璋使將兵討先主。因屯江陵。蜀平。先主以達爲宜都太守。後以不發兵救關羽。懼罪。率衆降魏。加拜散騎常侍。領新城太守。諸葛亮伐魏。欲誘達爲援。數書招之。達與相報答。魏人疑之。達懼。遂反。未幾。敗滅。

許攸，攸三國魏南陽人。字子遠。少與袁紹曹操善。初平中。隨紹在冀州。官渡之役。諫弗與操相攻。弗聽。乃亡詣操。後得冀州。攸有功焉。攸自恃勳勞。時與操相戲。操銜之。後從行出鄴東門。顧謂左右曰。此家非得我。不得出入此門也。人有白者。遂見殺。

韓綜，綜三國吳當子。襲侯領兵守武昌。淫亂不軌。孫權以其父故。不問。綜內懼。遂奔魏。魏以爲將軍。封廣陽侯。數犯吳境。權常切齒。後爲諸葛恪所敗。斬送其

首。

晉

王，如晉新豐人。初爲州武吏。遇亂流移至宛。結流人爲亂。自號大將軍。領司雍二州牧。與石勒結爲兄弟。後歸土敦。屬敦從弟稜。敦謀逆。稜每諫之。敦勸如殺稜。稜被害。敦陽驚捕如誅之。

司馬，晉亮三子。字延年。元康初。進封郡王。永興初。以長沙王又黨廢。惠帝還洛。復義封太興初。進位太宰。明帝寢疾。義與王導同受顧命。咸和初。坐弟宗免官。及蘇峻作亂。義詣峻稱述其勳。峻大悅。詔復義爵位。峻平。賜死。

司馬顥。晉孚孫。字文載。封河間王。元康中鎮關中。趙王倫篡位。徵兵於顥。顥將赴之。聞二王兵盛。乃追軍迴。以應二王。惠帝反正。進位侍中太尉。納趙驥詭說。遣使邀成都王穎。長沙王又討問。問敗。詔以顥爲太宰。雍州牧。顥廢皇太子。立穎爲太弟。助穎謀逆。穎敗。顥據有關中。永嘉初。詔以顥爲司徒。乃就徵南陽王

模遣將扼殺之。

羊亮。晉。祜從子。字長玄。有才能。多計數。累轉大鴻臚。時惠帝在長安。亮與關東聯謀。內不自安。奔并州。爲劉元海所害。

羊。曼。晉。祜從孫。字祖延。元帝以爲丞相主簿。委以機密。歷晉陵太守。以公事免。任達放縱。好飲酒。時州里稱阮放爲宏伯。郗鑒爲方伯。胡毋輔之爲達伯。卞壺爲裁伯。蔡謨爲朗伯。阮孚爲誕伯。劉綏爲委伯。而曼爲黯伯。號兗州八伯。以擬古之八儂。尋爲王敦右長史。知敦不臣。終日酣醉。諷議而已。歷丹陽尹。蘇峻作亂。曼勒衆不動。因被害。

孟。觀。晉。東光人。字叔時。少好讀書。解天文。惠帝時。爲殿中中郎。賈后欲誅楊駿。使人諷觀。觀度后旨。頗加誣其事。及駿誅。以爲黃門侍郎。氏羌齊萬年反。命觀討之。生擒萬年。徵拜右將軍。趙王倫篡位。署爲安南將軍。假節屯宛。義軍既起。觀不從衆議。而爲倫守。及帝反正。斬首傳送洛陽。夷三族。



祖，約。晉。逖弟。字士少。逖卒。代狄爲豫州刺史。初。約兄納嘗密言於元帝。謂約將爲亂。階。帝不納。約自以名輩。不後郗。而不預。明帝顧命。又諸所表請。多不見許。遂懷怨望。會蘇峻反。遂與之合。兵敗。奔石勒。勒薄其爲人。殺之。

庾，楷。晉。羲子。孝武帝時。官豫州刺史。安帝時。會稽王道子憚王恭。殷仲堪等擅兵。故出王愉。爲江州。以爲形援。楷上疏。以江州非險要之地。不應使愉。詔不許。因懷恨。使子鴻說王恭。以譙王尚之兄弟握機權。勢過王國寶。恭亦素忌尚之。遂連謀舉兵。兵敗。奔桓玄。既又懼玄必敗。密遣使結會稽世子元顯。若朝廷討玄。當爲內應。謀泄被誅。

### 前秦

王，統。前秦。仕苻堅。歷益秦二州刺史。攻克仇池。及隴西鮮卑。累官鎮西大將軍。後降姚萇。爲萇子興所殺。

苻，宏。前秦。堅長子。堅自稱大秦天王。立宏爲皇太子。堅議大舉伐晉。宏方諫

不從。卒有淮南之敗。後宏將母妻歸晉。晉處之江州。歷位輔國將軍。桓立篡位。以宏爲涼州刺史。義熙初謀叛。寇湘中。伏誅。

徐，成。前秦琅邪人。爲王猛所知。從鄧羌擊燕。出入燕陣。旁若無人。以功拜右將軍。姚萇伐秦。遣成等討之。爲萇所獲。遂降於萇。後爲姚興所殺。

### 後秦

姚，泓。後秦興長子。孝友寬和。而無經世之用。興死。泓僭即帝位。改元永和。劉裕來伐。泓詣降。裕送建康。斬之。年三十。在位二年。

### 五胡

韋，立。五胡夏京兆人。字祖思。隱居養志。博涉經史。尤善屬文。姚興、劉裕並備禮徵辟。不就。赫連勃勃入長安。徵爲太子庶子。旣至。恐懼過禮。欲以道禍。勃勃怒曰。汝昔不拜姚興。今何爲獨拜我。我死之後。汝輩弄筆。當置我於何地耶。遂殺之。

## 南齊

張敬兒。南齊冠軍人。初名苟兒。有胆氣。好射猛獸。發無不中。初仕宋。累官寧朔將軍。入齊。積功官至車騎將軍。後被誅。

## 梁

侯景。梁朔方人。或云雁門人。字萬景。有膂力。善騎射。選爲北鎮戍兵。魏明帝殂。其后胡氏臨朝。爾朱榮自晉陽入弑胡氏。景以私衆見榮。榮擢爲定州刺史。齊神武爲魏相。入洛。誅爾朱氏。景復以衆降之。魏以爲司徒行臺。擁衆十萬。專制河南。神武疾篤。召景。景慮禍。及太清初。上表請降於武帝。武帝封爲河南王。後舉兵反。圍建康。陷臺城。帝以憂憤死。遂立簡文。復弑之。而自立。稱漢帝。王僧辨等討平之。

柳敬禮。梁仲禮弟。少以勇烈聞。粗暴無行檢。恆掠賣人。百姓苦之。故襄陽有柳四郎歌。官扶風太守。侯景渡江。敬禮赴援。與景頻戰。當著威名。臺城陷。與仲

禮俱見景。景遣仲禮經略上流。留敬禮爲盾。以爲護軍。敬禮謀殺景。不果。景征  
晉熙。謀襲其城。事泄。遂遇害。

蕭，正德。梁，正義弟。字公和。少蟲險。不拘禮節。初，武帝未有男。養之爲子。及帝  
餞祚。便希儲貳。後立昭明太子。封正德爲西豐侯。自此怨。望恆懷不軌。大通中。  
侯景至江。正德潛運空舫濟景。與景俱進。景推正德爲帝。改年爲正平。景爲丞  
相。臺城沒。復太清之號。降正德爲大司馬。正德有怨言。景矯詔殺之。

蕭，賁。梁，正立子。字世文。性躁薄。伯父正德爲侯景所立。賁出投之。專監造攻  
具。以攻臺城。當爲賊耳目。南康王會理。謀襲京。賁與子邕告之。賊矯封賁竟陵  
王。子邕隨郡王。並改姓侯氏。爲宗正卿。專權陵蔑朝政。俄而賊患其翻覆。殺之。

陳

沈，君公。陳，君游弟。有幹局。美風儀。文章典正。仕梁。歷御史中丞。自都官尙書  
爲義興王翫師。從翫奔陳。授侍中。隋平陳。以翫同謀。渡江。誅死。

沈，衆。陳旋子。字仲師。頗有文才。仕梁。爲太子舍人。侯景圍臺城。率衆宗族入援。軍容甚整。城陷。衆降於景。景平。累官左民尙書。武帝即位。遷中書令。性忝嗇。過甚。朝士共誚其所爲。衆遂忿恨。歷詆公卿。非毀朝政。坐是賜死。

陳·叔文。陳宣帝十二子。字子才。封晉熙王。輕險好虛譽。頗涉書吏。官至侍中。宣毅將軍。隋師破臺城。率屬先降。隋文帝責其不忠。諸臣並慚懼。叔文獨欣然自得。仕隋爲宣州刺史。

陳·寶應。陳侯官人。父羽有才幹。爲郡雄豪。侯景之亂。晉安太守以郡讓羽。羽傳郡於寶應。武帝以爲閩州刺史。領會稽太守。寶應性反覆。多變詐。娶苗異女爲妻。侯安都討異。寶應遣兵助之。又資周迪兵糧。出寇臨川。及迪破。文帝命章昭達討寶應。執送建康。斬之。

留·異。陳長山人。善自居處。言語醞藉。爲鄉里雄豪。梁代歷晉安。安固。二縣令。侯景署爲東陽太守。文帝平會稽。封異永興侯。異外示臣節。恆懷兩端。後被討。

兵敗伏誅。

華，皎，陳暨陽人。仕梁爲尙書比部令史。陳文帝爲侯景所執，皎方事景，遇文帝甚厚。景平，文帝爲吳興太守，以皎爲都錄事，爲人聰慧，勤於簿領。文帝即位，除開遠將軍，進爵爲侯。歷尋陽太守、湘州刺史。宣帝旣誅，韓子高、皎亦內不自安，遣使勾引周兵奉蕭歸爲主，詔吳明徹輕兵襲之。皎敗，請降，送京師，誅之。

元，天穆，後魏拓跋孤六世孫，性和厚，美形貌，善射，有能名。六鎮之亂，尙書令李崇、廣陽王深北討，天穆奉使慰勞諸軍，路出秀容，爾朱榮見其法令齊整，深相結託。天穆遂爲榮腹心，累封上黨王，遷太宰。孝莊帝以其榮黨，外示寵敬，內畏惡之，與榮同時見殺。

元·世儁，後魏嵩子，襲高平縣侯。歷官征東將軍、青州刺史。爾朱兆寇京師，詔世儁以本官爲都督，防守河橋。及兆至，世儁出迎，時論非之。孝靜初，歷遷尙書令，以輕薄好去就，詔送晉陽，卒謚躁戾。

元，禹。後魏世遵弟。累官鎮遠將軍東海太守。帶峒崙戍主。頗好內學。每云晉地有福。孝昌末。遂詣爾朱榮。與榮同入洛。除中軍將軍。封鄆城縣開國伯。爲并州東面大都督。鎮樂平。榮死。土民王惡氈起義殺之。

叱列，延慶。後魏代西部人。少便弓馬。有胆力。常從爾朱榮討擒葛榮於相州。除使持節撫軍將軍。累擢尙書左僕射。定州刺史。後韓陵戰敗。北降齊。以罪誅。沈，陵。後魏文秀族子。字道通。太和間。孝文南伐。陵歸降。陵質妍偉。辭氣暢辨。孝文奇之。累官南徐州刺史。持節冠軍將軍。孝文崩。叛走。爲下邳戍人所射殺。侯深。後魏尖山人。機警有胆略。孝明末年。隨杜洛周南寇。後歸爾朱榮。爲中軍副都督。孝莊帝時。歷平定二州刺史。節閔帝立。隨爾朱兆拒齊神武於廣阿。兆敗走。遂降於齊。從神武破爾朱氏於韓陵。及孝武入關。復懷願望。尋行青州事。自惟反覆。慮不獲安。遂舉兵反。其下拒之。深率騎奔梁。中途亡散。爲賣漿者所斬。

侯莫陳·悅。後魏代人。好田獵。便騎射。會牧子作亂。遂歸爾朱榮。爾朱天光討關西。榮以悅爲天光右廂大都督。西伐克獲。皆與天光賀拔岳略同勞效。永熙末。岳召悅共討靈州。悅誘岳斬之。岳所部奉宇文泰征悅。悅部衆離散。乃棄軍走。追騎將及。遂自縊而死。

姬·澹。後魏代人。字世雅。在晉爲州從事。後歸魏。事桓穆二帝。征伐有功。官至信義將軍。封樓煩侯。六修之亂。澹率衆歸晉。劉琨因以討石勒。澹兵敗。走死。

### 北齊

司馬·世雲。北齊子如兄子。輕險無行。累遷潁州刺史。所在聚斂。仍肆姦穢。侯景反。舉州從之。景渦陽敗後。世雲復有異志。爲景所殺。

高·阿那肱。北齊市貴子。妙於騎射。便辟善事人。爲武成所愛重。武平中爲右丞相。周師逼平陽。河那肱從節度諸軍。專事欺罔。貽誤戎機。及尉遲迴至關。阿那肱遂降。至長安。授大將軍。出爲澹州刺史。大象末。在蜀。從王謙起兵。誅死。



高，乾。北齊翼子。字乾邕。魏孝莊時除河北大使殺爾朱兆監軍孫白鶴。高歡出山東。乾迎謁。以曉達時機。爲歡所重。孝武帝將貳於魏。望乾爲己用。於華林園讌罷。殷勤逼之。乾許之而非其本心。後帝知乾泄漏前事。召乾賜死。

彭，樂。北齊安定人。字興。驍勇善騎射。初隨杜洛周。降於爾朱榮爲都督。又從高歡出山東。嘗與宇文泰相拒。樂深入。被刺。腸出。納之不盡。截去復戰。身被數劍而還。後復戰。樂馳入宇文泰營。虜將佐四十餘人。高歡使樂追泰。泰窘曰。癡男子。今日無我。明日豈有汝耶。何不急收金寶。樂如言。獲金帶一束。歸天保初。封陳留王。遷太尉。以謀反。伏誅。

### 隋

元，弘嗣。隋洛陽人。歷觀州幽州總管長史。專以嚴峻任事。煬帝有取遼東之意。命往東萊海口監造船。煬立感作亂。或告弘嗣謀應立感。執送行在。除名。徙日南道死。

元，冑。隋。洛陽人。魏昭成帝六世孫。英果多武藝。美鬚眉。有不可犯之色。周時數從征伐。官至大將軍。周趙王謀害文帝。冑以身入衛得免。文帝受禪。封武陵郡公。突厥爲患。以冑有威名。拜靈州總管。坐與蜀王秀交通除名。煬帝時坐死。王世充。隋人。其父本西域胡。煬帝南巡。世充爲東郡留守。及羣雄割據。世充在洛陽。奉越王侗爲帝。與李密戰。大敗之。旋廢侗。自稱鄭帝。後與秦王世民戰。大敗乞降。尋被斬於長安。

王伯當。隋。初從東郡賊帥翟讓。荐李密於讓。讓推密爲主。未幾密殺讓。令伯當分統其衆。從密降唐。後密復叛。事敗。從死。

李子雄。隋。脩人。弱冠從周武帝平齊。以功授帥都督。文帝受禪。爲驃騎將軍。伐陳之役。以功進位大將軍。煬帝時擒幽州竇。抗破漢王。諒累官右武侯大將軍。會楊玄感反。詔鎖子雄送行在。子雄殺使者亡歸玄感。及玄感敗。伏誅。

李渾。隋。穆子。字金才。仕周。爲左侍上士。後歸文帝。以功封安武郡公。從楊素

破突厥。進位大將軍。初穆孫筠卒。帝議立嗣。渾謂其妻兄宇文述曰：「若得襲封，當以國賦之半。」每歲奉公。述因入白，得封。累遷右驍衛大將軍。後二歲，不以俸物與述。述大恚，告渾反。宗族三十餘人，皆誅死。

段，達。隋姑臧人。文帝爲丞相時，以爲大都督，領親信兵，常置左右。及即位，累遷開府儀同。太子左衛副率。大業中，張金稱作亂遼東，詔達擊之。數爲賊挫，諸賊輕之，號爲段姥。後附王世充。世充僭尊號，以達爲司徒。及敗，坐誅。

徐，圓朗。隋兗州人。大業末爲盜。據本郡，以兵徇鄆、邢。北至東平，盡有之。初附李密，繼歸竇建德。劉德闢兵起，圓朗應之。遂自號魯王。後唐兵至，圓朗戰屢敗。棄城夜亡，爲野人所殺。

裴，仁基。隋河東人。字德本。少饒勇，便弓馬。平陳之役，以親衝從征。先登陷陣。裴儀嗣。煬帝時，進位光祿大夫。李密據洛口，帝令仁基爲河南道討捕大使。旋以其歸密。密以爲河東郡公。密敗，爲王世充所虜。署爲禮部尚書。後仁基不

自安。謀歸國。爲世充所殺。

裴蘊。隋忌子。仕陳。歷直閣將軍。具寧令。以父在北。陰奉表於文帝。請爲內應。陳平超授開府儀同三司。煬帝時。爲太常少卿。時常好聲色。蘊奏括天下周齊梁陳樂家子弟。皆爲樂戶。其六品以下。有善音樂。及倡優百戲者。皆置太常。自是異技淫聲。咸萃樂府。累擢御史大夫。與裴炬虞世基。參掌機密。候伺人主微意。鍛鍊刑獄。順意輕重。引致姦黠。共爲朋黨。進位銀青光祿大夫。及司馬德戡爲亂。遂見殺。

蘇威。隋綽子。字無畏。仕周。位至開府。文帝受禪。徵拜太子少保。與高穎同心協贊。天下稱平。煬帝時。歷尙書右僕射。開府儀同三司。從征吐谷渾遼東。當時尊重朝臣。莫與爲比。以奏對失旨。除名。宇文化及弑逆。以威爲光祿大夫。開府儀同三司。化及敗。歸李密。密敗。歸東都。越王侗以爲上柱國。王世充僭署太師。威自以隋室舊臣。所經之處。皆與時消息。以求容免。及唐太宗平世充。威欲請

見不許。慙死於家。

唐

朱友恭。唐壽春人。本姓李。名彥威。朱全忠畜爲己子。積功至武寧軍留後。昭宗東遷。徵拜左龍虎統軍。以衛宮闕。受全忠密旨。弑昭宗。既而全忠自河中至。執友恭斬之。

朱宣。唐下邑人。少販鹽爲盜。後隸曹全晟。以戰功積官天平軍節度使。朱全忠鎮宣武。以兄事宣。全忠已襲取滑州。欲并吞諸鎮。遂發兵攻之。宣敗走。爲葛從周所執。斬於汴橋下。（按舊唐書。舊五代史。作朱宣。此從新唐書。及新五代史。）

朱粲。唐城父人。隋大業中從軍伐賊長白山。亡命爲盜。號可達汗賊。自稱迦樓羅王。度淮。屠竟陵沔陽。轉剽山南。僭號楚帝。建元爲昌建。所至殘戮無遺。軍匱。掠婦人小兒烹食之。兵敗奔菊潭。乞降高祖。尋奔王世充。東都平。斬洛水上。

牟羽可汗。唐回紇酋長葛勒可汗次子。名移地健。其妻僕固懷恩女也。代宗時。詔以雍王适爲元帥。東會回紇。助懷恩平史訥義。進收東都及河北。遂册爲可汗。永泰初。懷恩反。誘回紇吐蕃入寇。懷恩卒。回紇與郭子儀結盟而去。建中時。牟羽欲入寇。其相頓莫賀諫。不從。爲頓木賀所擊殺。

李，子通。唐沂州永人。少貧。以漁獵爲生。家有餘則以賙人。隋大業末。依長白山賊左才相。以武力雄其間。後據江都。僭帝位。國號吳。建元明政。旋爲輔公祐所敗。東走太湖。襲吳郡。據餘杭。東舉會稽。南距嶺。西抵宣城。北太湖。盡有之。武德間。杜伏威討之。敗降。以有異圖。伏誅。

李，巨川。唐逢吉從曾孫。字下已。乾符進士。河中王重榮辟掌書記。重榮討黃巢。書檄奏請皆屬巨川。黃巢之敗。人言巨川有助力。重榮死。復爲節度使楊守亮記室。守亮爲韓建所擒。巨川械以從。題木葉遣建祈哀。建釋。縛置幕府。日夜導建不臣。光化初。朱全忠陷河中。將攻潼關。遣巨川詣軍納款。因言當世利

害爲全忠所殺。

李·密。唐襄平人。字玄邃。一字法主。趣解雄遠。多策畧。初爲隋煬帝宿衛。謝病去。感勵讀書。聞包愷在緱山。往從之游。以漢書一帙掛牛角。行且讀。湯素見而奇之。令子玄感。傾心結納。玄感起兵。密爲之謀主。以不能用其策而敗。又與翟讓據洛口。稱魏公。江淮以北。遠近響應。旋爲王世充所敗。歸唐。拜光祿卿。以失望。復叛。盛世彥討斬之。

李寶臣。唐范陽內屬奚。字爲輔。初爲范陽將張鎮高假子。冒其姓。名忠志。叛服不常。累事安祿山。史思明。思明死。獻恆趙。深定易五州。擢禮部尙書。賜姓名。封趙國公。名其軍曰成德。拜節度使。遂有巨室。易趙深冀六州地。財用豐衍。招徠亡命。雄冠山東。後與田承嗣交構。爲所賣。德宗立。拜司空。寶臣晚節尤猜忌。以子惟岳暗弱。恐下不服。多殺骨鯁將。丞乃携貳。旋爲妖人所害。

杜·洪。唐鄂州人。爲里非兒。僖宗時。黃巢亂江南。永興刺史募民雄彊者爲土

團以禦盜。於是人人知兵。洪爲州將有功。逐岳州刺史居之。既又乘虛入鄂。自爲節度留後。即拜本軍節度使。陰附朱全忠。絕東南貢道。昭宗時。爲李神福劉存所敗。誅死。

柳，璨。唐公綽族孫。字昭之。爲人鄙野。其家不以諸柳齒。少孤貧好學。昭宗時擢翰林學士。崔胤沒。以諫議大夫同中書門下平章事。起布衣至是不四歲。朱全忠謀篡弑。璨厚結之。全忠後疑璨有貳。流璨崖州。尋斬之。

皇甫，縛。唐臨涇人。貞元進士。累遷戶部侍郎。憲宗方伐蔡。急於用度。縛哀會嚴亟。以辦濟師。帝悅。蔡平。遂同門下平章事。縛以吏道進。既由聚斂勾剝爲宰相。天下怨之。惟以巧媚自固。穆宗立。貶縛崖州司戶參軍卒。

崔，胤。唐慎由子。字垂休。小字緇郎。擢進士第。昭宗時。累遷御史中丞。喜陰計。附離權強。外簡重而中險譎。崔昭緯屢荐之。由戶部侍郎。同中書門下平章事。素厚朱全忠。委心結之。以全忠力。四拜宰相。權震天下。世謂崔四入。全忠兵逼



同華。韓全誨挾帝幸鳳翔。胤召全忠以兵迎天子。李茂貞殺全誨等。與全忠約和。遂盡誅宦官。胤進侍中魏國公。帝自鳳翔還。胤揣全忠將篡奪。欲握兵自固。全忠令其子反諒殺之。

張光晟。唐蓋屋人。初爲騎卒。累遷單于都護。建中初。坐事降太僕卿。光晟負才。怏怏不得志。朱泚僭逆。光晟爲僞節度使兼宰相。後降。李晟被誅。

高。尚。唐雍奴人。母老。丐食自給。尚客河朔。不肯歸。與令狐潮相善。淫其婢。生一女。遂留居。然篤學善文辭。嘗喟然謂汝南周統曰。吾當作賊死。不能齧草根求活也。李齊物爲新平太守。荐諸朝。養錢三萬。介之見高力士。力士以爲才。置門下。諷近臣表其能。擢左領軍倉曹參軍。安祿山表爲平盧掌書記。因出入臥內。導祿山反。陷東都。官至僞侍中。後爲史思明所誅。

高。開道。唐信陽人。世煮鹽爲生。少趨勇。走及奔馬。隋大業末。依河間賊格謙。謙滅。與其黨百餘人亡海曲。出剽滄州。衆稍附。武德初。陷漁陽郡。有之。自號燕

王尋因羅藝請降。詔以爲蔚州總管。封北平郡王。己又北連突厥。告絕於藝。復稱燕。時臺盜相繼。平開道欲降。自疑反覆得罪。猶恃突厥自安。然將士多山東人。思歸。衆益厭亂。愛將張金樹。以其徒譟攻之。開道知不免。擐甲挺刃據堂坐。與妻妾飲酒。金樹畏不敢前。開道先縊其妻妾諸子。而後自殺。自起兵至滅。凡八年。

秦彥。唐徐州人。本名立。乾符中。聚徒百人。殺下邳令。入黃巢黨中。旣敗。降高駢。累表和州刺史。及駢被囚。彥遣人殺駢。秦宗權使孫儒襲揚州。彥與之合。儒攻城未得志。疑彥有異謀。數彥反駢罪。斬之。

悉怛謀。唐吐蕃將。爲維州副使。太和中來降。李德裕遣兵據其城。以其狀聞。帝從僧孺議。詔德裕以其城及悉怛謀悉歸吐蕃。吐蕃誅悉怛謀於境上。

畢師鐸。唐冤句人。乾符初。與里人王仙芝。嘯聚爲盜。善騎射。其徒目爲鷄子。仙芝死。降高駢。駢敗黃巢於浙西。多師鐸力。甚見寵待。後駢惑於呂用之。師鐸

因自稱大丞相。與鄭漢璋張神劍等攻駢於揚州。殺之。後爲孫儒所殺。  
陳，少游。唐博平人。幼習老莊書。爲崇立生。諸儒推爲都講。大學士陳希烈高  
其能。旣擢第。補南平令。長權變一切幹濟。賄謝權幸。以是數遷。建中初。累官淮  
南節度使。加同中書門下平章事。李希烈陷汴。送少游歛。會有人得其降表。少  
游聞之。羞悸死。

劉，季真。唐龍兒子。隋大業時。龍兒舉兵稱王。爲梁德所破。唐兵起。第六兒復  
聚爲盜。附劉武周。季真從之。自號太子王。六兒爲拓定王。迭爲邊害。張綸李仲  
文討之。季真降。詔以爲石州總管。賜姓李。封彭山郡王。宋金剛戰滄州。勢未決。  
復連武周。武周敗。秦王執六兒斬之。季真奔高滿政。被殺。

蔣，立暉。唐事朱全忠。爲腹心。昭宗東遷。立暉爲樞密使。受全忠旨。弑帝於行  
在。全忠殺立暉以自解。貶爲凶逆百姓。

蔣，鎮。唐義興人。與兄鍊。並以文學進。大寶末。舉賢良。累轉諫議大夫。附阿韓

視。遷給事中工部侍郎。以儉稱於時。後屈節於朱泚。署僞宰相。泚平斬東市。閻，知微唐立德孫。聖歷初爲豹韜衛將軍。武后時突厥默啜請和親。后遣知微持金帛護送武延秀聘其女。默啜怒非天子子。囚延秀。挾知微入寇。朝廷以知微賣國夷其族。知微不知逃還。武后業已然。乃曰。惡臣疾子。賜百官甘心焉。於是骨斷鬢分。非要職者不能得。子則先以武三思壻免死。

### 後梁

王，珂。後梁重榮兄子。嗣重榮爲留後。唐昭宗以爲河中節度使。結晉以拒梁。梁太祖絕晉援。以兵攻之。晉不能救。遂降太祖。太祖以珂爲晉壻。疑其貳己。遂殺之。

司空，頤。後梁清陽人。唐僖宗時舉進士不第。後入梁爲太府少卿。旋降晉。都虞侯張裕多過失。頤屢繩以法。後爲裕所誣。莊宗族殺之。

李，勳。後梁臨晉人。勇悍多力。甚有氣誼。初仕黃巢。後歸太祖。署都將。從討蔡

賊。秦宗權伐兗鄆皆有功。邠王友裕攻澤州。太祖令讜將兵太行。以違節度。無功誅死。

張，萬進。後梁雲州人。初爲本州小校。亡命投劉守光爲裨將。既又殺守光子而歸晉。末帝攻之。復降梁。官至兗州節度使。惟輕險反側。貞明中據城叛。城破。族誅。

趙，巖。後梁僱子。末帝時爲戶部尙書租庸使。與張漢傑、漢倫等居中用事。哀克商旅。其門如市。租庸之物。半入其私。魏州牙兵數爲亂。巖議分相魏爲兩鎮。牙兵亂。以魏博降晉。梁由是盡失河北。莊宗兵將至汴。末帝登建國樓。或勸幸洛陽。保險。以召天下兵。巖曰。勢已如此。一下此樓。何人可保。末帝卒死於樓上。後巖走許州。依溫韞。韞斬其首。獻莊宗。尋族誅。

劉，知俊。後梁沛人。字希賢。少事時溥。溥與梁相攻。知俊與其麾下降太祖。多戰功。累官檢校太尉。封大彭郡王。太祖性猜忌。屢殺諸將。知俊遂叛。附李茂貞。

己而茂貞左右忌知俊功。以事間之。知俊乃奔王建。建以爲武信軍節度使。使攻茂貞。取秦鳳階成四州。建陰忌其材。而蜀人亦共嫉之。遂見殺。

韓，建。後梁。長社人。字佐時。少爲軍校。唐僖宗時。爲華州刺史。時諸鎮皆武夫。獨建撫緝兵民。又好學。李茂貞犯京師。昭宗將奔太原。建追帝。及於富平。請幸華州。乃率兵圍行宮。迫帝散殿後軍。及三都衛兵。殺李筠及諸王。欲因以行廢立。以諸藩多發兵。言欲迎天子者。懼而止。帝還京。封許國公。梁太祖以兵嚮長安。建出降。梁受禪。拜司徒同中書門下平章事。罷相。出鎮許州。爲亂軍所殺。

### 後唐

元，行欽。後唐。幽州人。初爲劉守光裨將。敗降爲明宗養子。莊宗以其驍勇。賜姓名曰李紹榮。寵冠諸將。明宗反。莊宗爲伶人郭從謙所害。行欽出奔至平陸。被執。送京師。見明宗不屈。斬於洛陽市。

毛·璋。後唐。滄州人。梁末爲軍校。以滄州降晉。授貝州刺史。爲人有膽勇。晉與

梁相拒河上。累戰有功。莊宗滅梁。拜瑋華州節度使。在鎮多爲不法。又得魏王繼岌伐蜀餘賫。既富而驕。益爲淫侈。明宗聞而惡之。賜自盡。

朱，友謙。後唐許州人。字德光。初名簡。爲陝州軍校。殺節度史王珙。附於梁。梁太祖銖以爲子。更名友謙。表爲陝州節度使。太祖即位。封冀王。徙鎮河中。友珪弑太祖。友謙附於晉。封四平王。莊宗滅梁。入洛。賜友謙姓名曰李繼麟。加守太師尙書令。一時恩寵無比。宦官伶人。多求賂於友謙。友謙無以應。被讒死。

朱，弘昭。後唐太原人。少事明宗。爲客將。累遷山南東道節度使。明宗病。秦王從榮起有端。大臣皆求去。以弘昭及馮贇爲樞密使。乃殺秦王而立愍帝。潞王從珂反。愍帝召弘昭計事。弘昭投井死。

朱，守殷。後唐少事莊宗爲奴。名會兒。莊宗即位。以守殷爲軍使。好言人陰私長短。以自給。遷蕃漢馬步軍都虞候使。郭從謙作亂。莊宗即召守殷軍。守殷按軍不動。聞莊宗已崩。遣人趣明宗入洛。遷宣武軍節度使。明宗幸汴州。守殷不

自安。乃閉城反。兵敗自殺。

李，存孝。後唐飛狐人。本姓安。名敬思。給事太祖。賜姓名。以爲子。常從爲騎將。累有功。存孝猿臂善射。手舞鐵槌。出入陣中。以兩騎自從。戰酪易騎。上下如飛。積官刑部留後。爲李存信所譖。乃附梁。通趙。太祖自將兵圍之。被誅。

殷，凝。後唐開封人。事梁祖爲懷州刺史。梁祖過境。凝獻饋甚豐。得遷鄭州刺史。末帝以爲招討使。梁亡降唐。凝爲人佞巧。善窺逆人意。因伶人景進。通貨宮掖。莊宗甚親愛之。賜姓名曰李紹欽。授兗州節度使。明宗立。竄遼州。賜死。

康，延孝。後唐代人。初事梁末帝爲左右先鋒指揮使。見帝任用羣小。知其必亡。乃以百騎奔莊宗。陳取汴策。莊宗用其策。滅梁。賜姓名曰李紹琛。遷保義軍節度使。征蜀之役。延孝功爲多。師還。聞郭崇韜等被殺。懼禍及。擁衆返蜀。自稱西川節度。任圖孟知祥合攻之。被執至鳳翔。見殺。

康，義誠。後唐代北三部落人。字信成。以騎射事李克用。明宗時。累遷節度使。



秦王從榮反。義誠心結之。後朱弘實以兵擊殺從榮。義誠遂與有隙。閔帝即位。潯王從珂反。義誠請率京兵西扼關。弘實爭之。帝爲斬弘實。及帝出奔。義誠降從珂。被殺。

郭，從謙。後唐莊宗時伶人。優名門高。嘗有軍功。爲從馬直指揮使。以姓郭。拜崇韜爲叔父。而皇弟存文又以從謙爲養子。崇韜死。存文見囚。從馬直軍士王溫又以宿衛謀亂被誅。從謙恐。遂激軍士爲亂。會李嗣源反。莊宗東幸汜水。從謙因率兵攻帝。帝被射崩。嗣源入洛。以從謙爲景州刺史。已而殺之。

溫，韜。後唐華原人。初事李茂貞。爲華原鎮將。冒姓李。名彥韜。茂貞以爲耀州刺史。降梁。梁以爲靜勝軍節度使。復其姓。更名曰昭圖。在鎮發掘唐諸陵。昭陵所藏鍾王筆迹。遂傳人間。徙鎮忠武。降於唐。賜姓名曰李紹冲。明宗入洛。收下獄。尋流德州。賜死。

董，璋。後唐爲梁驍將。以軍功進指揮使。梁亡。事唐爲邠寧節度使。郭崇韜伐

蜀。以爲馬步軍都虞侯。軍事大小皆與璋參決。蜀平。以爲劍南東川節度使。孟知祥鎮西川。璋與連謀以反。尋疑知祥賣己。率兵攻知祥。爲所敗。陵州刺史王暉執殺之。

閻寶。後唐鄆州人。字瓊美。少爲朱瑾牙將。瑾走淮南。寶降於梁。末帝時。爲保義軍節度使。貞明中。晉軍圍荊州。寶遂降晉。拜儉校太尉。同中書門下平章事。已而晉軍討張文禮於鎮州。以寶爲招討使。兵戰敗。退保趙州。慚憤卒。

### 後晉

尹暉。後晉魏州人。少勇健。爲魏帥楊師厚軍士。入唐。累遷嚴衛都指揮使。高祖入洛。常遇暉。暉馬上橫鞭。以揖高祖。高祖忿之。因譖於末帝。及即位。官右衛大將軍。時范延光據都謀叛。以暉失意。密使人招之。暉懼而逃。爲人所殺。安。重榮。後晉朔州人。小字鐵胡。善騎射。初爲振武巡邊指揮使。高祖起太原。以十騎叛歸。高祖即位。拜成德軍節度使。時高祖與契丹約爲父子。重榮憤然。

數以非誚。及安從進反襄陽。重榮亦率兵向鄴。高祖遣杜重威逆之。戰敗。被斬。安從進。後晉。振武索葛部人。唐明宗時。爲保義彰武軍節度使。靖泰中。徙鎮山南東道。高祖卽位。加同平章事。時藩鎮多慕高祖所爲。各蓄異志。從進與安重榮陰相結託。厚置兵力。及高祖北幸鄴。以防重榮。從進遂自襄陽舉兵反。爲李建崇等所敗。自焚死。

李彥詢。後晉。荊州人。素無檢節。忤其親。絕供饋。初仕唐。歷河陽軍司馬。范延光叛。署步軍都監。委以守陣。招討使楊光遠欲撓延光。而誘彥詢訪得其母。令於城下招之。彥詢射殺其母。旋隨楊光遠出降。授坊州刺史。以賊誅。

皇甫遇。後晉。眞定人。爲人有勇力。虬髯善射。初事唐。爲武勝軍節度。所至苛暴。以誅斂爲務。晉高宗時。爲神武統軍。契丹入寇。將渡河。遇等擊敗之。開運間。爲都指揮史。屯於中渡。都招討使杜軍威陰送款契丹。出降。表示諸將。遇不得已。亦降。契丹遣遇與張彥澤先入京師。遇行至平棘。絕吮而死。

婁，繼英。後晉。歷梁唐爲耀州團練使。晉高祖時。爲左監門衛上將軍。范延光反。遣人以蠟丸書招繼英。事泄。乃出奔許。張從賓反於洛陽。繼英投之。從賓敗。爲杜重威所殺。

張，彥澤。後晉。其先突厥部人。後徙居太原。驍悍殘忍。數從唐莊宗明宗戰伐。事晉爲右武衛大將軍。與契丹戰。數有功。後降契丹。耶律德光遣以兵先入京師。彥澤縱軍士大掠。德光至。殺之。

楊，光遠。後晉。沙陁部人。字德明。初爲唐莊宗將。戰折一臂。後降晉。高祖以爲節度使。出帝時。光遠益驕。乃反。召契丹入寇。其子承勳劫光遠幽之。遣人奉表待罪。遂伏誅。光遠召夷狄爲天下首禍。卒滅普氏。瘡痍中國者三十餘年。

趙，在禮。後晉。涿州人。字幹臣。唐莊宗時。爲指揮使。將魏兵戍瓦橋關。軍士皇甫暉作亂。推在禮。在禮遂反。還攻魏。自稱兵馬留後。明宗時。歷鎮橫海秦寧等處。所至邸店羅列。積貲巨萬。晉出帝時。爲北面行營都虞侯。以擊契丹。未嘗有

戰功在宋州。人尤苦之。已而罷去。宋人喜而相謂曰。眼中釘拔去矣。尋復職。乃籍管內口。率錢一千。自號拔釘錢。晉亡。契丹入汴。在禮。遇洩刺等。迎拜馬首。侵辱誅求。不勝其憤。遂自經死。

趙·延壽。後晉常山人。本姓劉。爲趙德鈞養子。姿貌奸柔。稍涉書史。仕唐。累遷樞密使。鎮徐州。高祖起義於晉陽。唐末帝委延壽北伐。遂陷於契丹。契丹主委以圖南之事。許以中原帝之。乃導誘數軍。蠶食河朔。既封燕王爲樞密使。延壽又求爲皇太子。契丹主不許。進大丞相。契丹主死。延壽下教於諸道。稱權知南朝軍國事。爲永康王烏裕所執。籍其家。以延壽入國。竟卒於契丹。

趙·德鈞。後晉幽州人。本名行實。唐莊宗賜名紹斌。後改名德鈞。鎮幽州。凡十餘年。甚有善政。高祖起於晉陽。契丹兵至太原。唐末帝詔德鈞邀擊之。德鈞遲疑不從。通款契丹。求立以爲帝。仍許晉祖長鎮太原。契丹不許。遂降焉。高祖至。迎謁馬前。高祖不禮之。尋死於契丹。

漢

李·守貞。五代漢。河陽人。晉高祖鎮河陽。以爲客將。後累功拜同平章事。旋降契丹。爲司徒。高祖入京師。拜太保河中節度使。高祖崩。杜重威死。守貞懼。不自安。遂起兵反。兵敗。自焚死。

杜·重威。五代漢。朔州人。尙晉高祖女弟宋國大長公主。累從征伐。積功拜成德軍節度使。無行。不知將略。攻破安慶榮於鎮州。悉取府庫及重器。贖產。高祖知而不問。在鎮重斂其民。戶口凋敝。後率晉軍十萬降契丹。遣還鄴。漢高祖定京師。重威固守。食盡。乃降。高祖崩。大臣共誅之。

張·允。五代漢。鎮州人。少爲張文禮參軍。降唐。官水部員外郎。知制誥。歷事晉漢。郭威入京師。允匿於佛殿。承塵墜而卒。

趙·思綰。五代漢。魏州人。高祖時。據永興以叛。送款於李守貞。守貞以爲晉昌節度使。隱帝遣郭威討之。先圍守貞於河中。居數日。思綰城中食盡。殺人而食。

每輻宴。殺人數百。庖宰如牛羊。思綰計窮。諸郭從義乞降。拜鎮國軍。未幾有二志。從義擒斬之。

### 後周

馮道。後周景威人。字可道。少純厚。好學。善屬文。負米奉親。不恥惡衣食。天祐中。事劉守光。守光敗。事張承業。薦之晉王。及莊宗即位。拜戶部侍郎。明宗即位。拜端明殿學士。晉滅唐。道事晉。累加司徒。封燕國公。契丹滅晉。道又事契丹。以爲太傅。漢高祖立。乃歸漢。以太師奉朝請。周滅漢。道又事周。拜太師。兼中書令。卒。諡文懿。道歷事四姓十君。在位二十餘年。視喪君亡國。未嘗以屑意。自號長樂老。著書數百言。陳己官爵以爲榮。論者鄙之。

曹筠。五代吳爲馬軍指揮使。叛奔吳越。徐溫厚遇其妻子。武義初。吳越兵敗於香灣。筠乘勢復歸。溫自數昔日不用筠言者三。不問筠去來之罪。歸其田宅。復其軍職。筠內媿卒。

王，延稟五代。閩審知假子。歷建州刺史。將兵弑嗣王延翰。推鑄立之。鑄餞於郊。臨訣。輒大言無使。老兄復來。鑄深憾之。後率兵攻鑄。兵敗見執。鑄曰。果煩老兄復來矣。遂見殺。

連，重遇。五代。閩光山人。與朱文進俱事王鏐。文進爲拱宸都將。重遇爲控鶴都將。號親兵。及王昶立。更募勇士。賜與較厚。兩人遂作亂。重遇迎王曦爲君。昶遂不免。已又弑曦。迎文進立爲閩王。晉開運初。爲林仁翰所誅。

王，贊。五代。楚環子。累官岳州刺史。馬希萼引兵攻廢王希廣。贊爲指揮使。大破之。尋攻岳州。贊堅守不。屈國亡歸唐。以遷延後至。見殺。

### 南唐

皇甫暉。南唐。魏州人。初爲魏軍卒。屯貝州。時唐莊宗失政。暉爲人驍勇無賴。與裨將趙在禮爲亂。夜焚貝州。以入於魏。在禮以暉爲馬步都指揮使。及明宗入魏。遂與在禮合謀。莊宗之禍。自暉始。明宗即位。暉自軍卒擢拜陳州刺史。後



仕江南。李璟以爲江州節度。周世宗征淮。暉戰敗。被擒。創重卒。

皇甫，繼勳。南唐暉子。累遷神衛統軍都指揮使。時年尙少。貲產優贍。極遊宴之好。及宋師至。諸軍多敗。繼勳欲李煜速降。聞敗則喜。偏裨或有邀宋師者。輒鞭而抓之。一日煜躬自巡城。見宋軍容始懼。知爲左右所蔽。及還宮。收繼勳付大理。始出。軍士悉集。斃割之。

陳，覺。南唐泰州人。李景時以詔事宋齊丘。官至樞密史。與李徵古同擅威柄。周世宗師駐迎鑾鎮。覺奉表貢方物。遂定畫江稱藩之議。齊丘旣敗。覺安置饒州。遣使誅於路。

### 南平

高從誨。五代南平。季興長子。字尊聖。季興卒。襲位。懼見討。奉表歸唐明宗。應順初。封南平王。荆南地狹兵弱。介於吳越爲小國。自吳稱帝而後。南漢與閩蜀皆稱帝。從誨所嚮稱臣。利其賜予。諸國賤之。皆目爲高賴子。又曰高無賴。

前蜀

山，行章。前蜀。一名章。自言晉山濤之後裔。唐末官眉州刺史。營城周遭八里有奇。名曰臥牛城。後降王建。授都押牙。出鎮黎州。坐與諸蠻交通。乃斬以徇。

王，宗勳。前蜀。建假子。乾德中爲清道指揮使。唐師入境。與王宗儼宗昱爲三招討以拒之。兵敗降唐。尋爲魏王繼岌所殺。

李，昊。後蜀。字穹佐。前後仕蜀五十年。前蜀降唐。昊草其表。後主降宋。其表亦昊所爲。蜀人潛署其門曰。世修降表李家。

宋

王·倫。宋。日族孫。字正道。家貧無行。爲任俠。往來京洛間。數犯法。幸免。汴京失守。欽宗御宣德門。倫直造請前自荐其才。欽宗立。除兵部侍郎。倫下樓。挾惡少數人。傳旨撫定。都人乃安。高宗時奉命使金。屢被拘留。及金人脅之以官。竟不受。見迫而死。

王·雲宋。齊弟。字子飛。舉進士。從使高麗。撰難林志以進。靖康初。以給事中使幹離不軍。議割三鎮。固言康王宜將命。及王受命。雲爲之副。行次磁州。民以爲姦。譟而殺之。王遂南還。是役也。雲不死。王必北行。議者以是驗天命云。

王·黼。宋祥符人。字將明。多智善佞。中進士第。何執中荐擢校書郎。蔡京復相。黼與有力。京德之。除左諫議大夫。黼因執中進。乃欲去執中。使京頡頏。遂疏其二十罪。宣和初。拜特進少宰。京致仕。黼陽順人心。盡反所爲。四方翕然稱賢相。時朝廷欲結女真共圖燕。黼贊之。括天下丁夫。計口出算。得錢二千二百萬緡。買五六空城以奏凱。欽宗即位。誅死。

李·全。宋北海人。本農家子。權譎善下人。弓馬趨捷。能運鐵槍。時號李鐵槍。楊安兒妹四娘子。狡悍善騎射。衆萬餘。全以衆附。通焉。四娘子遂嫁之。時高忠愍集忠義民兵。全因附忠愍。合兵攻克海州。數敗金人。寧宗時。累進承宣使。許國爲淮東安撫制置使。待之倨。遂圖國。繼而北剽山東。元兵攻青州。全戰不利。乃

降元。授山東行省。求南歸。浸爲宋患。兵敗。被誅。

柔，霸柔。宋龍岡人。多力善射。走及奔馬。嘗爲盜并汾間。北漢劉鈞用爲指揮使。成樂平。天會初。率所部降宋。太祖補羈縻內直。未幾。又奔北漢。署供奉官。尋弒繼恩。謀奔宋。爲郭無爲所殺。

唐，恪。宋錢塘人。字欽叟。以蔭登第。累官戶部侍郎。徽宗時。京師暴水。至汴。且溢。付恪治之。夾旬水平。靖康初。金兵入汴。爲中書侍郎。金要割三鎮。恪從之。而止。諸道勸王兵勿前。及金兵薄城。始悔之。遂罷相。金人陷汴京。逼百官推戴。張邦昌。恪旣畫名。仰藥死。

秦，檜。宋江寧人。字會之。政和間登第。又中詞學兼茂科。靖康間。累遷御史中丞。二帝北遷。檜從至金。被留。金人尋縱之使歸。紹興間爲相。未幾落職。尋復相。力持和議。阻止恢復。殺岳飛。竄張浚趙鼎。一時忠臣良將。誅鋤畧盡。和議遂成。爲相十九年。易執政二十八人。皆世無一譽柔佞易制者。性陰險。如崖阱深阻。

察事之卒。布滿京城。晚年殘忍尤甚。死後人民惡之。爲立鐵像。跪於岳廟門首。路人以唾溺汚之。夷堅志。秦檜矯詔殺岳飛後。遊西湖。舟中得暴疾。昏闕之際。見一人。被髮瞋目。厲聲責曰。汝誤國害民。殺害忠良。我已訴於天矣。汝當受鑊。杖於太祖皇帝殿下。檜自此怏怏以死。其子熹亦死。方士伏章見熹荷鐵枷。云。父在鄂都。果見檜。與万俟卨。俱荷鐵枷。備極諸苦。理宗朝。有考試官。歸荆湖。暴死。後甦曰。適見趙宋斷秦檜事。受鐵杖。押往某處受報矣。

張，邦昌。宋東光人。字子能。以進士累官太宰。靖康初。金人陷汴京。執二帝北去。册立邦昌爲楚帝。諸臣不附。乃迫孟太后聽改。高宗即位。貶邦昌於潭州。賜死。

張·俊。成紀人。字伯英。少負才氣。起於羣盜。與金人戰。屢立奇功。拜樞密使。知朝廷欲議和。首請納兵柄。秦檜德之。盡罷諸將兵權。付俊。歲餘無去志。檜復嗾江邀論罷之後。官至太傅。封清河郡王。俊當南渡後。首握兵柄。與韓世忠劉錡

岳飛並爲名將。世稱張韓劉岳。惟俊附檜成和議。構成岳飛之獄。爲世所鄙。張·覺。宋義豐人。在遼第進士。爲遼興軍節度副使。金人入燕。以爲臨海軍節度使。知平州。徽宗時內附。爲金人所襲。奔宋。完顏宗望以納叛責宋。索覺。王安中殺覺。函首與金。

黃·潛。善。宋邵武人。字茂和。第進士。累擢徽猷閣待制。知河間府。靖康初。金人入攻。康王承旨拜副元帥。及即帝位。進右僕射。兼中書侍郎。陳東上書。言潛善輩不可任。歐陽澈又以書詆時事。潛善敢帝。并殺之。識與不識。咸爲流涕。金陷鄆濮。右不許景衡請帝避其鋒。潛善以爲不足慮。俄泗州奏金人且至。乃蒼黃出走。死者相枕籍。人無不怨憤。後貶英州死。

賈·貫。宋開封人。字道輔。一作道通。少出李憲門。性巧媚。給事宮掖。善策人主微旨。徽宗時。以供奉官主明金局。蔡京進用。貫實引之。京旣相。用兵青唐。貫出監軍。時人稱京爲公相。因稱貫爲媪相。旋以平方臘功。進太師。封廣陽郡王。金

將粘罕南侵。貫以河北宣撫使奔入都。遂謫竄英州。未至。詔數其十六罪誅之。貫握兵二十年。權傾一時。窮姦稔惡。流毒四海。雖醜醜不償責。

湯，思退。宋處州人。字進之。紹興時。以附秦檜。累官參知政事。拜右僕射。尋罷。隆興初。復相。金人索四郡。思退許之。且令孫造諭敵。以重兵脅和。爲言者所論。遂罷相。太學生張觀等上書。請斬思退。思退憂悸死。

賈，似道。宋。涉子。字師憲。少落魄。爲游博。不事操行。理宗時。以姊爲貴妃。累拜右丞相。軍漢陽。元兵攻鄂州。似道割地納幣。請和。詭以鄂州圍解。表聞。尋入朝。益崇政。權傾中外。度宗立。以太師平章軍國事。封魏國公。賜第葛嶺。作半間堂。吏抱文書。就第署。大小朝政。一切決於館客。日與群妾鬪蟋蟀。元兵迫建康。宋軍屢敗。似道單舸奔揚州。陳宜中等交章論劾。謫高州團練使。循州安置。爲鄭虎臣所拉殺。

劉，豫。宋。阜城人。字彥游。世業農。豫始舉進士。宣和中。除河北提刑。金人南侵。

豫棄官避亂。建炎中。張懿。荐知濟南府。時盜起山東。豫不願行。執政惡之不許。豫忿而去。金人攻濟南。昭以利。豫懲前忿。遂納款。兀朮徙豫知東平府。册爲皇帝。國號大齊。都大名府。紹興中。豫遷都汴。籍民兵三十萬。分三道入寇。楊沂中大破之於藕塘。金人聞敗。詰豫罪狀。有廢豫意。金主先令兀朮僞稱南侵。至汴。宣詔責豫。以鐵騎數千圍宮門。迫之行。併其子麟。徙於臨潢。封豫爲曹王。年六十五卒。僭號凡八年。

金

大興國。金事熙宗爲寢殿小底。權近侍局直長。最見親信。後以事杖責。海陵謀弒。因李老僧結興國。夜開門。矯詔納海陵。因弒熙宗。海陵旣立。授絳陽武寧節度使。賜名邦基。海陵敗。磔死。

左。企弓。金字君財。遼天慶末。知樞密院事。金兵拔上。京北樞密院。恐忤旨。不以時奏。企弓以聞。因陳守備之策。遼主將西幸。企弓諫不聽。後降金。太祖旣定。



燕從初約。以與宋人。企弓獻詩以諫。太祖不聽。後爲叛將張覺所害。

武，仙。金威州人。貞祐間。知真定府。封恆山公。尋降元。仙與史天倪俱治真定。懼天倪圖己。乃賊殺天倪來降。哀宗復封爲恆山公。汴京被圍。詔入。援逗遛不行。哀宗在蔡州。又遣近侍責仙赴難。將士相視哽咽。皆願赴難。仙懼衆心有變。乃與將士盟。誓不負國家。無何。復改計。趨金州。軍多道亡。乃東還。蔡州破。趨澤州。爲戍兵所殺。

施，宜生。金邵武人。字明望。博聞強記。宋政和擢第。授穎州教授。金兵入汴。宜生走投劉豫。齊廢入金。爲翰林學士。使宋。宋臣以首丘諷之。宜生意動。爲瘦語曰。今日北風甚勁。於是宋始警備。使還。其副使以聞。金人烹之。

胡，天作。金管州人。字景山。初以鄉兵守禦本州。累功爲管州刺史。平陽置帥府。以天作充便宜招撫使。權元帥左都監。封平陽公。元光初。知府事。尤虎忽失來。以兵降元。大作已受元官爵。至濟源。即脫走。先遣人奏表南京。元將惡其反。

覆。遂誅之。

崔，立金將陵人。少貧。無行。積階至安平都尉。哀宗自卜東走。以立爲西面元帥。立殺二相。以太后誥命梁王承恪監國。詣元帥速不斛納款。自稱太師軍馬都元帥。尙書令鄭王。及速不斛至青城。立執太后皇后梁王荆王等。送其軍。搜索焚掠。備極慘毒。千戶李伯淵。以計刺殺之。

國，用安金。淄州人。先名安用。本名咬兒。紅襖賊李安兒餘黨。初降元。天興初。據徐宿邳三州。與劉安國王德全歸金。封克土。行東京尙書省事。賜姓名完顏用安。已而與安國德全有隙。會哀宗徵勤王兵。用安假朝命徵兵徐宿。欲以圖山東。女國德全不應。用安因遣人殺安國。率師攻徐州。不能下。退還濰水。降元。後又降宋。爲浙東總管。兵敗。投水死。

唐括，辯金。本名幹骨刺。尙代國公主。與右丞相秉德合謀弑熙宗。立海陵。封王。賜鐵券。海陵知其伎忍。畏忌之。嘗與辯觀太祖畫像。海陵指示辯曰。此眼似

爾。辯色動。海陵亦色動。由是益忌辯。及與蕭裕謀致宗本罪。裕構辯嘗與宗本謀反。殺之。

時全。滕陽人。初爲紅襖賊。後入金。累官同僉樞密院事。時全從子青先已歸宋。元光初。全與元帥訛可同伐宋。青與相拒。全陰懷兩端。軍還。距淮二十里。矯詔命諸軍留收淮南麥。會水暴漲。渡淮。爲宋兵所乘。敗績。金人殺之。

移刺窩幹。金西北路契丹之部族。先從撒八爲亂。後殺撒八。自爲都元帥。世宗使人招之。不降。正隆中。遂稱帝。改元天正。後尙書右丞僕散忠義獲賊。稍合住。縱還賊中。使誘捕窩幹以自効。稍合住乃與神闖幹執窩幹詣右都監完顏思敬。獻俘京師。被誅。

明

丁魁楚。明永城人。崇禎時。累官兵部右侍郎。總督蘄遼保定軍務。畿輔被兵。坐。下吏後放還。福王時。起故官。督兩廣。唐王立於福州。封平粵伯。閩中事敗。與瞿

式耜共立桂王。進東閣大學士。清兵至。魁楚奉王走岑溪。爲李成棟追獲。遂降成棟。尋被殺。

仇鸞。明鉞孫。嗣侯爵。世宗時出鎮大同。俺答寇邊。鸞爲避戰計。通俺答義子脫脫。約毋犯大同。且許通市。俺答轉犯京師。鸞入援。遇寇而潰。冒功加太子太保。總督京營成政。尋俺答款。關請市。鸞與嚴嵩深相結。遂開馬市於大同宣府。邊卒盡撤。大遭寇侮。因罷官。恚恨而死。

伊昌隆。明泰和人。字彥謙。洪武進士。授翰林院修撰。改監察御史。建文即位。視朝晏。昌隆上疏諫未幾。以地震上言。謫福寧知縣。燕兵既逼。昌隆勸帝罷兵。許燕王入朝。設有蹉跌。便舉位讓之。若沈吟不斷。進退失據。將求爲丹徒布衣。且不可得。成祖入京。以前奏貸死。後忤尙書呂震下獄。尋被誣論死。沒其家。方逢年。明雲槐孫。字書田。萬曆進士。天啟初典試湖廣。發策忤魏忠賢。削籍歸。崇禎間。累遷禮部尙書。東閣大學士。罷歸。紹興破。魯王航海。逢年追不及。降

於清。已而以臘丸書通閩。事洩被殺。

左，懋泰。明懋第弟。先降賊。後降於清。已授官。謁懋第。懋第曰：此非吾弟也。叱出之。

平，安明。定子。小字保兒。爲太祖養子。驍勇善戰。官都督僉事。建文初。從李景隆伐燕。爲先鋒。屢破燕軍。後兵敗被執。燕王惜其材勇。以爲北平都指揮使。永樂間。帝巡北京。覽章奏。見安名。曰：平保兒尙在耶。安聞之。遂自殺。

尼堪外蘭。明建州衛人。爲蘇克蘇濟河部圖倫城主。萬曆中。導李成梁攻古勒城主阿台。阿台守禦甚堅。未能下。尼堪外蘭自往城下招撫。城中遂殺阿台以降。尼堪外蘭復使明兵殺覺昌安及子塔克世。建州諸部皆歸之。惟清太祖以祖父故。不肯從。後清太祖吞併建州諸部。尼堪外蘭失勢。走明邊。明人執付清太祖。遂被殺。

危，素明。金谿人。字太樸。一字雲林。少通五經。游吳澄范梈門。元至正間。以荐

授經筵檢討。與修宋、陳、金三史。纂后妃等傳。事逸無據。素買餽餅饋宣寺。叩之得實。乃筆諸書。卒爲全史。累遷翰林學士承旨。明初爲翰林侍講學士。與宋濂同修元史。兼弘文館學士。備顧問。論說經史。他日帝御東間側室。素行簾外。履聲橐橐然。帝曰。誰對曰。老臣危素。帝曰。朕謂文天祥也。而乃爾。遂謫和州。守余闕廟。歲餘。幽恨卒。

朱亮祖。明六安人。元授義兵元帥。兵敗歸太祖。累功授廣信衛指揮使。攻陳友定。功最多。會攻桐廬。圍餘杭。遷浙江行省參政。副征南將軍廖永忠取廣東、廣西。以功封永嘉侯。鎮廣東。亮祖勇悍善戰。而不知學。所爲多不法。太祖召至。與其子暹俱鞭死。

朱顯忠。明如臯人。爲張士誠守將。降太祖。以指揮僉事。從傅有德克文州。遂留守之。蜀將丁世珍召番數萬來攻。食盡無援。或勸走避。不聽。裹創力戰。城破。爲亂兵所殺。

吳·襄。明三桂父。崇禎初。官錦州總兵。坐失機。下獄。起提督京營。李自成陷京師。脅襄以書。招三桂。三桂聞歌女陳沅爲賊將所得。作書絕父。迎清兵入關。擊賊。自成執襄殺之。盡屠其家。

李·景隆。明文忠子。讀書。通典故。每朝會進止。雍容甚都。歷掌左軍都督府事。燕師起。建文以爲大將軍北伐。景隆不知兵。惟自尊大。諸宿將不爲。用兵屢敗。遂迎降。授左柱國。永樂初。以廷劾。禁錮私第。卒。

那·鑑。明雲南土官。嘉靖中。殺其姪土知府那憲。奪其印。蜜約交蠻爲亂。既降。復叛。兵敗。自殺。

阮·大鍼。明懷寧人。字圓海。崇禎時。附魏忠賢。名列逆案。失職。後避流賊。居南京。頗招納遊俠。時復社名士顧杲等。作留都防亂揭。逐之。大鍼懼。閉門謝客。獨與馬士英深相結。福王立。士英秉政。以爲兵部侍郎。旋進兵部尚書。既得志。專翻逆案。中外憤怒。清兵渡江。走金華。爲紳士所逐。轉投方國安。尋降清。從攻仙

霞嶺僵。仆石上死。

阿魯台明。韃靼部知院。殺可汗鬼力赤。迎立木雅失里。成祖出塞。阿魯台與其主分部東奔。至靜虜鎮。遇明軍敗遁。後數入貢。請討馬哈木。爲故主復仇。帝義之。封爲和寧王。以戰敗瓦剌。使來獻俘。久之勢寔強。漸驕蹇。復入興和塞。詔親征之。阿魯台棄其輜重馬畜北徙。宣德間數敗於瓦剌。部曲離敏。東走兀良哈駐坎。爲瓦剌脫權所襲殺。

思，任發。明雲南麓川平緬宣慰使。永樂間。襲職。外修職貢。陰思兼并。宣德間。屢與木邦爭地抗殺。正統間。復侵孟定各土司境。勢益熾。詔以定西伯蔣貴。兵部尙書王驥。大舉討之。任發乞降。驥密令諸將分道入。任發敗。奔孟養。爲緬人所擒。挾之求麓川地。旋獻之雲南。伏誅。

馬，士英。明貴陽人。字瑤草。萬曆進士。崇禎時累官右僉都御史。坐事廢。復起爲兵部侍郎。北京陷。士英等立福王於南京。升東閣大學士。進太保。與阮大鍼



相結。專權昏憤。日事報復。名器猥濫。清兵破南京。飾其母爲太后。奔杭州。事露。杭人逐之。竄伏天台山寺。其家丁縛獻清軍。被殺。

高，傑。明米脂人。初從李自成賊中。號翻山鶴。嘗殺總兵許定國一家。與自成妻邢氏通。遂竊邢氏降明。累功官至總兵。福王時封興平伯。鎮揚州。州民不納。史可法移其衆於瓜州。與黃得功劉良佐劉澤清號四鎮。後引兵北上。會定國守睢州。誘殺之。

崔，呈秀。明蘇州人。萬曆進士。天啟初。巡按淮揚。卑污狡獪。贓私狼籍。都御史高攀龍。盡發其狀。詔革職。候勘。呈秀大窘。夜走魏忠賢所。乞爲養子。時忠賢爲延臣交攻。憤甚。得呈秀。遂用爲腹心。日與計畫。以中旨復其官。呈秀進同志諸錄。皆東林黨人。又進天鑒錄。皆不附東林者。令忠賢憑以黜陟。善類爲空。呈秀

忠賢寵嗜利彌甚。朝士多拜爲門下士。關黨五虎。以呈秀爲魁。累遷兵部尙書。總憲法勢傾朝野。莊烈帝卽位。有詔逮治。自縊死。追戮

稽明江西俄化人。舉進士。授吳江知縣。賊汙狼籍。以淫刑博強項名。被劾改國子助教。詔附汪文言。得爲工部主事。文言敗。欽程力擠之。後又事魏忠賢。爲十狗之一。於羣小中尤爲無恥。爲給事中潘士開所劾。忠賢責以敗羣。削其籍。忠賢誅。下獄。論死。李自成陷京師。欽程首破獄出降。自成敗。隨之西走。不知所終。

梅思祖。明夏邑人。初爲元義兵元帥。叛歸張士誠。爲中書左丞。守淮安。徐達兵至。迎降。太祖擢爲大都督府副使。從取浙西湖。蘇。山東西。河南北。入秦。河。取興元。論功封汝南侯。署雲南布政使。善撫輯。遠人安之。卒於官。後坐胡惟庸黨。滅其家。

莫天祐。明元末聚衆保無錫州。張士誠既受元官。乃降士誠。累表爲同簽樞密院事。及平江既圍。他城皆下。惟天祐堅守。士誠破。胡廷瑞急攻之。乃降。太祖

以其多傷明兵。誅之。

陳，演。明井研人。天啟進士。改庶吉士。授編修。崇禎時。累官吏部尙書。武英殿大學士。是時國勢愈危。演無所籌畫。惟以賄聞。李自成陷京師。被執。以獻巨金。獲釋。尋殺之。

喜，寧。明本降番。正統中。爲太監。怙寵縱恣。土木之役。從帝陷于敵。輒爲也先畫策。邀求賞賜。導以入邊寇掠。後伏誅。

鄭，芝龍。明南安人。字飛黃。小字一官。天啟時。據海島爲盜。受招撫。累官總兵。明亡。擁唐王。圖恢復。封南安伯。晉平國公。兵敗。降清。以其子成功據臺灣。不降。被殺。

羅，汝才。明陝西人。混名曹操。從張獻忠爲盜。就撫於總督洪承疇。未幾。復叛。寇擾山陝。河南湖廣四川。旋歸李自成。號善戰。自成倚若左右手。自成既克中州。忌汝才。出不意。斬之。兼其衆。

蘇觀生。明東莞人。字宇霖。崇禎中。由保舉歷戶部員外郎。福王時。進郎中。南京破。偕唐王聿健入福建。與鄭芝龍等擁立王。超拜東閣大學士。參機務。見鄭氏不足有爲。請王赴贛州。經略江西湖廣。及贛州破。唐王死於汀州。觀生退入廣州。與何吾騶等擁立唐王弟聿錕。王封觀生建明伯。掌兵部事。時永明王由榔已立於肇慶。因發兵互攻觀生。旣敗肇慶兵。頗務粉飾。諱敗報。清兵至。死之。

清

洪承疇。清福建南安人。字亨九。明萬歷進士。官至薊遼總督。與清軍戰於松山。兵敗被執。明帝以承疇殉國。予祭十六壇。承疇初亦自分必死。清百計勸之。遂降。詳清史貳臣傳。

方大猷。清烏程人。字歐虞。號庵藍。明崇禎進士。善書。工詩。官直隸井陘道。李自成陷京師。大猷降之。順治初。復降清。累擢山東巡撫。勤撫兗沂間土賊。屢奏績。後降調河南管河道。以科斂婪取。革職論絞。死於獄。

方，孝標。清拱乾長子。本名玄成。後避諱。以字行。別號樓岡。順治進士。累官內弘文院侍讀學士。座事流寧古塔。後得釋。入滇。受吳三桂僞翰林承旨。三桂敗。首先迎降。得免死。因記在滇黔時所聞所見。明季清初。彼邦時事。著鈍齋文集。滇黔紀聞。戴名世著南山集。多採之。後名世被誅。孝標已死。剝骨。親族坐死。及流徙者甚多。

方，拱乾。清桐城人。字坦菴。明天啟進士。官左諭德。兼侍讀。李自成陷北京。被執。入清官少營事。以江南科場案納賄作弊。其五子章誠在取中之內。巧流寧古塔。後釋歸。改字甦庵。

王，之綱。清宛平人。明總兵。福王時。鎮開封府。多鐸下河南。之綱走江甯。尋死。平徐州有功。授福建雲霄總兵。加都督僉事。鎮汀州。以結交內監吳良弼革職。流當陽堡。道死。

王，屏藩。清奉天人。驍勇善戰。投誠吳三桂。以左都督充左營總兵。與馬寶並

加倚任。旋從三桂叛。由四川進窺陝甘。數出偏師。絕清糧運。後敗於秦州。退據保齊。城破自殺。

王，輔臣。清。大同人。明末爲盜。順治大同總兵姜瓖叛。輔臣從之。阿濟格圍大同。輔臣降。隨洪承疇定貴州雲南。累官陝西提督。駐平涼。吳三桂反。以書招之。輔臣發其書。不應。奉命征四川。中途叛附三桂。歸平涼。三桂封爲平遠大將軍。陝西東路總管。後爲圖海所殺。窮蹙乞降。隨入京。道死。

王，鰲永。清。淄川人。字淵溯。明天啟進士。累官通州巡撫。順治間降清。官戶部侍郎。巡撫山東河南。會李自成裨將趙應元戰敗。僞降鰲永於青州。鰲永遂遇害。

白齊文。清。美國人。同治初。投効中國。統常勝軍。與洪楊軍戰。旋通款於李秀成。謀據松江城。爲內應。李鴻章黜之。乃降於秀成。不得志。復往投漳州。爲郭松林所殺。

白，廣恩清。陝西人。明崇禎間。積功官蔚州總兵。尋鎮山海關。清軍由山東北旋。廣恩合唐通等邀擊於密雲之螺山。悉潰敗。後歸陝。數與李自成戰。敗奔固原。遂降於自成。封桃源伯。順治間。阿濟格定陝西。廣恩投誠。授騎都尉世職。未幾死。

任·珍。清。宜陽人。明副將。守河州。順治間。阿濟格定陝西。珍迎降隸。孟喬芳標下。賀珍犯西安。珍守城西門。鏖戰八晝夜。卻之。累擢興安總兵。積功晉左都督。加太子太保。授三等子。後坐事論斬。免死。徙遼陽。

吳三桂。清。遼東人。字長伯。明崇禎時。以武舉。累官總兵。封平西伯。鎮山海關。李自成陷京師。三桂以愛妾陳圓圓爲自成所得。遂引清兵入關。破自成。封平西王。鎮雲南。聖祖議撤藩。三桂叛之。稱天下都招討兵馬大元帥。旬月間。有雲南貴州四川湖南廣西之地。耿精忠等皆響應。因稱周帝。置百官。旋病死。其孫世璠。爲清所滅。

吳·之·茂。清錦州人。官至總兵。吳三桂犯四川。之茂與巡撫羅森並降。率兵犯秦州。後屢敗。竄入松藩。所至焚掠。清兵克保寧。被擒。伏誅。

李·元·鼎。清吉水人。字梅公。明天啟進士。官至光祿寺少卿。李自成陷京師。元鼎從之。順治初投誠。累官兵部右侍郎。坐事論絞。免死。杖徒折贖。

李·世·忠。清固始人。本名兆受。爲捻首。初降何桂珍。未幾戕桂珍。附李秀成。後復以滁州投誠於勝保。更名世忠。以功累擢江南提督。幫辦袁甲三軍務。敗太平軍。克天長六合江浦。又率所部削平苗圩。收復懷遠。招撫捻匪李允等。後因事革職。復以凶暴恣肆。被誅。

李·本·深。清甘肅西寧人。初爲明總督洪承疇部將。福王時。官至提督。順治初。率部兵十三萬降。從平江南。授三等子。隨承疇進勦湖廣。取貴州。累官貴州提督。加太子太保。吳三桂反。本深叛應之。貝子彰泰復貴陽。本深降。械至京。磔死。李·成·棟。遼陽人。初爲明總兵。守徐州。順治間。多鐸南征。成棟率所部降。從



定江南浙江。又隨博洛定浙東。進取福建。累官兩廣提督。與修養甲合兵定廣東。以爭功有隙。遂據南雄叛。納款明桂王。後兵敗。墜水死。

李，建泰清。曲沃人。明天啟進士。官至大學士。崇禎末。督師西勤流寇。及哀師陷。遂降賊。順治間。起授弘文院大學士。坐事罷歸。姜瓖據大同叛。建泰據太平。遙應之。爲清軍所攻。勢迫。降。伏誅。

尙，可喜清。遼東人。隸漢軍鑲藍旗。初爲明廣鹿島副將。航海歸清。授總兵官。從征宣化代州。俘獲甚衆。順治初。從入關。勦李自成。定潮南。進平廣東。遂留鎮廣州。封平南王。吳三桂反。其子之信附之。可喜臥疾。弗能制。尋死。

尙，之信清。可喜子。吳三桂反。之信附之。尋悔罪。自歸。襲封平南王。鎮廣東。命征韶州。救永興。皆不赴。性暴戾。跋扈。怨望。屬員張永祥首告之。信諸不法事。有旨逮問。未行。賜死於廣州。

尙，之孝清。可喜次子。康熙間。任藩下都統。吳三桂耿精忠反。潮州總兵劉進

忠應。之之孝。圍潮州。戰失利。尋還京。列內大臣。授宣義將軍。平三桂。餘黨於江  
西。之信。賜死。之孝。坐削職。

金，聲桓。清遼東人。明時隸左良玉部下。爲後營總兵。順治間。阿濟格至九江。  
聲桓隨良玉子夢庚投誠。授鎮守江西總兵。尋改提督。屢勦滅明宗室。及故官  
之據城匿山寨者。江西底定。聲桓自以功高。未酬封爵。遂據南昌叛。後爲清軍  
所破。中失。投水死。

阿睦爾撒納。清蒙古和碩特部拉藏汗之孫。初爲輝特部台吉。乾隆間。準部內  
亂。與達瓦齊合兵入伊犁。殺刺麻達爾濟而擁立之。同時復兼併杜爾伯特部。  
脅降其台吉。而自遷帳於額爾齊斯河。漸欲侵畧準部。與達瓦齊相攻戰。懼不  
敵。率所部降清。備言伊犁可取狀。清封爲親王。尋以定邊左將軍副班第征伊  
犁。破達瓦齊而逐之。謂功將授藩封。而阿睦爾撒納必欲總長準部。遂由間道  
北逸。畧準部叛。先後爲策楞兆惠成克札布所敗。兩次遁入俄境。以患疽卒。

姜，壤。清。榆林人。明宣化鎮總兵。李自成至居庸關。壤迎降。順治初。多爾袞定京師。壤乘機入大同。奉表投誠。遂鎮太同。尋據城叛。阿濟格往圍之。食盡。其下湯振或斬壤並其兄弟首。出降。

苗，沛霖。清。安徽人。以生員爲團練長。始叛。爲勝保招降。積功授川北道。與壽州豪族仇殺。攻陷壽州。旋以擒獻陳玉成。詔免治罪。後自結捻黨。戕官復叛。陷壽州。欲北趨中原。號召羣捻。悉衆圍蒙城。僧格林沁督陳國瑞往救。其部衆殺之以降。

夏，成德。清。廣寧人。明松山城守副將。崇禎間。洪承疇援錦州。次松山。成德密遣其弟通欵於清軍。約爲內應。清軍遂入城。擒承疇及巡撫丘民仰總兵王廷臣。曹變蛟等。順治間。封三等子。授沂州總兵。後回京病卒。

孫，延齡。清。遼東人。父龍。隨孔有德降清。授二等男。延齡襲爵。康熙時。爲鎮守廣東將軍。吳三桂反。延齡據桂林叛。應之。後從傅宏烈勸告。將歸順。三桂遣從

孫世琮誘殺之。

祖，澤清清。大壽四子。康熙間。由參領授廣東高雷廉總兵。據高州叛。降吳三桂。尋投誠。後又叛。清軍破高州。澤清遁入山。被擒。磔死。

耿精忠。清遼東人。先世自山東徙蓋州衛。祖仲明。以明官降清。從世祖入關。封靖南王。父繼茂襲爵。鎮福建。與吳三桂尙之信。孔有德爲清初四藩。精忠嗣位。與吳三桂同叛。旋而清兵所敗。降。仍統所部。後又謀叛。被殺。

馬，光遠。清大興人。明建昌參將。天聰間降清。授副都統。隸漢軍鑲黃旗。崇德間。授漢軍右翼都統。從征朝鮮。克平壤。江華島。又從征錦州。松山。坐攻松山時。詭言砲子已盡。奪職。

馬·逢知。清隰州人。原名進寶。仕明爲安慶副將。都督同知。順治間迎降。累擢金華總兵。大敗魯王部將阮進。張名振於舟山。官至蘇松常鎮提督。鄭成功犯江寧。逢知擁兵不救。坐誅。

馬，承蔭清。雄子。康熙間降清。授伯爵。給將軍勅印。尋又反。爲清軍所敗。復降。論死。

馬，得功。清遼東人。明總兵。順治間。多鐸下江南。得功縛福王及其妃以降。授鎮江總兵。隸漢軍鑲黃旗。隨征福建。積戰功。至福建提督。康熙間。勦廈門。戰死。馬，寶。清陝西人。初爲流賊。降於明桂王。始附孫可望。後從李定國。對淮國公。桂王敗。降吳三桂。以右都督充中營總兵。三桂叛。寶附之。率兵由貴州窺湖廣。三桂死。寶擁立其孫世璠。迨世璠旣破。寶勢窮蹙。乃赴希福軍前降。執至京。磔於市。

張，國柱。清鐵嶺人。明副將。順治初。率兵降。積戰功。累官雲南提督。加太子少保。從吳三桂。定雲南。所向克捷。三桂叛。國柱首附之。連陷衡州。長沙。岳州。清軍復湖南。貴州。國柱遁雲南。世璠敗。國柱乞降。旋伏誅。

張，縉彥。清新鄉人。明崇禎進士。累官兵部尙書。李自成陷京師。縉彥率百官

表賀。自成敗走。縉彥竄歸。福王時授原官。總督河北山西河南軍務。江南定。遷降。累官工部右侍郎。降補江南徽寧道。坐編刊無聲戲二集。自稱不死英雄。詭詞感衆。褫職流徙寧古塔。尋死。

章，于天。清。遼東人。崇德舉人。順治間。累官江西巡撫。金聲桓叛。于天從之。清軍圍南昌。聲桓懼于天泄其謀。殺之。

郭，義清。海澄人。康熙間授左江總兵官。孫延齡叛。應吳三桂。義與馬雄同叛。雄死。義偕雄子承蔭降清。以守南寧功。仍授左江總兵官。承蔭復反。義放還。尋死。

陳，之龍。清。宜春人。字去亢。明天啟舉人。敏達有才。歷官三邊監軍道。李自成陷陝西。之龍降賊。授僞寧夏節度使。入清。官至右僉都御史。巡撫鳳陽。勤平土寇。又擒黃毓祺於通州。後坐事奪職。尋死。

楊，來嘉。清。福州人。初從鄭錦爲都督。康熙初。降清。授襄陽鎮總兵官。吳三桂

反。來嘉附之。屢與清軍戰。後清軍破重慶。來嘉降。逮至京。死於道。

曾，養性。清奉天人。初從耿繼茂征廣東。隸靖南王藩下。康熙間。授藩下左翼總兵官。耿精忠反。養性附之。率兵犯浙江。清軍入福建。養性率衆降。磔死。

陳，洪明。清遼東人。隸漢軍鑲藍旗。康熙間。以筆帖式累官廣西巡撫。尙之信叛。附吳三桂。洪明從之。尋復降。流徙寧古塔。

陳，名夏。清溧陽人。字伯史。明崇禎進士。官修撰。福王時。以名夏曾附李自成。定入從賊案。順治初。降清。累官秘書院大學士。徇私植黨。揣摩執政意旨。務越格濫用匪人。以迎合固寵。奪我劾之。復與劉正宗共証名夏攬權市恩。欺罔罪。絞死。

楊，遇明。清錦州人。明守備。順治間降清。累官廣東提督。以老乞休。家於常德。子寶蔭。爲吳三桂藩下總兵。從三桂反。至常德。遇明爲內應。城遂陷。遇明尋死。清軍復沅州。寶蔭降。流徙寧古塔。

劉，秉政。清，漢軍正紅旗人。初爲雞澤知縣。累官福建巡撫。耿精忠反。秉政附之。後從精忠降。逮赴京道死。

劉，澤清。清，曹縣人。明時官至左都督。加太子太師。李自成陷京師。澤清與馬士英高傑等擁立福王。鎮淮北。封東平侯。多鐸圍揚州。準塔分兵由徐州趨淮安。澤清迎降。授三等子。後以謀叛被殺。

劉，應賓。清，沂水人。明進士。福王時官通政使。順治時降清。擢安廬池太巡撫。破擒金聲於徽州。招降寧國太平廣德等處賊首二百餘名。解散賊衆數萬。後爲洪承疇所劾革職。

賂，養性。清，嘉魚人。明崇禎間官至左都督。周延儒與吳牲同秉政。欲引用養性。牲持不可。養性遂搆陷牲。謫戍金齒。并日騰蜚語。構延儒。遂盡削其職。李自成陷京師。養性從之。多爾袞入京。養性又迎降。令總督天津軍務。以擅迎明福王使臣左懋第等革職。後降浙江都司掌印。尋卒。



譚，洪清萬縣人。明總兵。據川東。奉桂王約束。後降清。授川北總兵官。加勳義侯。康熙間。吳三桂叛。洪附之。清令其姪譚天叙往撫。洪詣降。尋復叛。爲清軍所擊。旋死。